



ATASSUT

UPA 2016/49-1

Siverth K. Heilmann

12. 05. 2016.

Sumiginnaanerit pillugit nalunaaruteqartarnissanut kommunini ataatsimoorussamik oqarasuaammik aalajangersimasumik sianerfigineqarsinnaasamik pilersitsinissaq pillugu kommuninut isumaqatigiinniaqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut. Sianerfigisinnaasatigut nuna tamakkerlugu kalerriutigineqartut tigooqqarneqartassapput, kommuninullu pineqartunut erngertumik ingerlateqqittarnissaat qulakkeerneqassalluni.

Ulloq unnuarlu sianerfigisinnaasap ilusilernissaanut Naalakkersuisut kommunit peqatigalugit aalajangiisnaatitaassapput. Siunertarinqartoq, tassaasoq innuttaasut tamarmik pisariunngitsumik pisortanut sianersinnaalernissaat sumiginnaanernillu kalerriisnaalernissaat taamaalilluni anguneqassaaq.

(Inatsisartunut ilaasortaq, Naaja H. Nathanielsen, Attaviitsoq)

ATASSUT-mit aallarniutigalugu siunnersuuteqartoq Inatsisartunut ilaasortaq attaviitsoq Naaja H. Nathanielsen qutsavigissavarput taama pingaarutilimmik siunnerfeqartumik aalajangiiffisassatut siunnersuumik saqqummiussaqaqarneranut.

Upernaaq manna siusinnerusukkut siullermeerlugu ilaatigut oqallisigisimavarput isumaginnittoqarfiup aqunneqarnera aaqqissuussaanageralu pillugit Inatsisartut peqqussutaata allangortinneqarnernissaa, tasanilu ilaatigut aamma nakkutilliisut nassuiaataanni naliliinerit tikinneqarsimallutik, minnerunngitsumik siunnersuuteqartup aamma tungavilersuinermini tikitaa tassaasoq kommunit maannakkut suliassaminnik nanertugaanerminni pisinnaanerat naammagintumik atorsinnaajunnaangajalersoq.

Taamaattumik ATASSUT-mit isumaqarpugut pisariaqalivittut innuttaasut ajornannginnerusumik qisuariarsinnaalernissaannik periarfissillugit suleriaatsip eqaallisarneqarnissaa. Soorunami qisuariarnerni eqqumaniarfigisassat arlaliupput aamma siunnersuuteqartup nammineq

nassuiaanerattut nalunaarutiginnittarnerit amerleriaateqarsinnaaneri naatsorsuutigineqarsinnaasoq. ATASSUT-mili tamanna ajornartorsiutitut nalilinnngilarput, taamaattorli meeqqat inuusuttullu ilaqutariillumi siusinnerusukkut ikiorserneqartalersinnaanerinut aqqutissiuussisoqarsinnaaneranut aqqutissaalluorsorivarput.

ATASSUT-miit pingaartipparput ataqqillugillu kommunit namminersinnaatitaanerisa qulagiinnannginnissaat, pingaarnertipparpulli meeqqat inuusuttut ilaqutariillumi toqqissisimanerusumik inuuneqalernissaannut ikiorsiinissamut aqqutissiuussinissaq.

Taamaattumik aamma ATASSUT-mit Naalakkersuisut aalajangiiffigisassatut siunnersuummut akissuteqarnerminni suliat maanna ingerlanneqartut eqqarsaatigalugit kommunit qanimut suleqatiginissaanik pingaartitsinerat isumaqatigaarput, soorlu aamma ilaatigut tikkuaraat kommunit ilaasa nammineq pissutsit pitsanngorsaaviginiarlugit suliniuteqalersimani, soorlu Qaasuitsup kommunianni qitiusumik kallerriisarfimmik Sullissivik.gl suleqatigalugit pilersitsisimani.

ATASSUT-mit qangaaniilli pingaartipparput sumiluunniit sulinermi misilittakkat pitsaasut siammarterneqartarnissaat, taamaattumik aamma soqutiginassaaq uunga siunnersuummut atatillugu suliat ingerlateqqinnissaanni Qaasuitsup Kommuniata misilittagarilersimasai alaatsinaaffiginiassallugit - siunertat assigiissimappatami pisariaqassaganngimmat suleriaatsimik allaanerulaaminertumik aamma aallartitsiniaanissaq.

Taamatut ATASSUT-mit aalajangiiffigisassatut siunnersuut oqaaseqarfigalutigu, siunnersuutip ingerlateqqinneqarnissaa innersuussutigissavarput aammalu aappasaaneerinninnissaq sioqqullugu Inatsisartut Ilaqutariinnermut Peqqissutsimullu ataatsimiititaliaannut ingerlatinneqarnissaa innersuullutigu.

Taamatuttaaq aamma suliat aallartinneqareersimasut eqqarsaatigalugit ATASSUT-mit paasilluarparput Naalakkersuisut suliat ingerlareersut eqqarsaatigalugit allannguutissatut siunnersuummik saqqummiussinerat, tamannalu ATASSUT-mit aamma taperserparput.

Qujanaq!